

Malaysia-Turkmenistan mahu isu Palestin ditangani

Oleh **KAMARIAH KHAIDI**
utusannews@mediamulia.com.my

PUTRAJAYA: Malaysia dan Turkmenistan menegaskan bahawa cabaran antarabangsa harus ditangani secara damai termasuk berkenaan isu Palestin.

Menerusi kenyataan bersama, Perdana Menteri, Datuk Seri Anwar Ibrahim dan Presiden Turkmenistan, Serdar Berdimuhamedow menekankan inisiatif damai tersebut harus selaras dengan undang-undang antarabangsa dan resolusi-resolusi Pertubuhan Bangsa-Bangsa Bersatu (PBB) berkaitan.

Pada masa sama, kedua-dua pemimpin turut menyeru supaya akses bantuan kemanusiaan ke wilayah Palestin tidak dihalang.

"Mereka menekankan kepentingan penyelesaian yang adil dan berkeadilan untuk membawa keamanan dan kestabilan kepada rantau berkenaan," katanya.

Terdahulu, Berdimuhamedow diberi sambutan rasmi di Bangunan Perdana Putra di sini sempena lawatan rasmi dua hari ke negara ini.

Dalam pada itu, kedua-dua pemimpin turut menekankan keperluan usaha bersama untuk membina keyakinan dan persefahaman, serta mengukuhkan kestabilan serantau serta antarabangsa.

Prinsip tersebut selaras dengan kedua-dua Zon Aman, Bebas dan Berkecuali ASEAN (ZOPFAN)



ANWAR Ibrahim mengiringi Serdar Berdimuhamedow yang diberi sambutan rasmi di Bangunan Perdana Putra. Putrajaya sempena lawatan rasmi beliau ke negara ini, semalam. - AFP

serta inisiatif Turkmenistan untuk Zon Aman, Kepercayaan dan Kerjasama di Asia Tengah.

"Dalam Malaysia bersiap sedia untuk memegang jawatan Pengerusi ASEAN pada tahun 2025, sokongan yang diberikan oleh Turkmenistan akan mem-

perkukuhkan lagi visi bersama ini, mempromosikan saling memahami, kemerdekaan serantau dan usaha keselamatan bersama.

"Malaysia menggalakkan Turkmenistan untuk mempertimbangkan penyertaan dalam Perjanjian Persahabatan dan

Kerjasama di Asia Tenggara (TAC) menurut kenyataan itu.

Sementara itu, Anwar menerima undangan Berdimuhamedow untuk melakukan lawatan balas ke Turkmenistan pada tarikh yang akan diputuskan melalui saluran diplomatik.